

# «L'ester che viva cun vus»

## 25 onns Cuminanza gidieua liberala da Turitg

DA GUIU SOBIELA-CAANITZ

■ **«Or hadasch» («chadasch» tenor la transcripziun tudestga) vul dir per ebraic «glisch nova». Quest num han ils fundaturs da la Cuminanza gidieua liberala (CGL) da Turitg dà 1978 a l'uniun novnaschida. Il davos numer (1) da ses bulletin, deditgà al 25avel anniversari da la CGL, rapporta dal cult divin festiv e cuntegna reflexiuns da rabin Tovia Ben-Chorin davart il giudaisssem liberal.**

### Nossa societad pluralistica

Pertge «liberal»? Lez moviment mundial vul dar ina resposta gidieua a la sfida da la secularisaziun. Rabin Tovia: «La raschun umana è comparida sco instanza da decisiun, e quai en las cuminanze gidieuas sco er en las cristianas, emancipadas visavi las autoritads ecclesiasticas. Quai ha manà ad ina crisa fritgaivla (...). Ils gidieus han entschat a far dumondas davart il giudaisssem. La perscrutaziun cristiana examinava la Bibla gidieua sut l'aspect da la critica istorica. Per simpatia han erudits gidieus svilupà la scienza dal giudaisssem per al perscrutar e represchentar en moda academica, mettend en dumonda l'autorità esclusiva dals rabins» (pp. 3-4). Tiers è vegnì en svilup che noss chantun paritetico enconuscha bain. Avant gnanca quaranta onns n'eràn lètg «mashadadas» en Grischun betg adina bain vesidas. Tant pli tar ina cuminanza da minorità sco la gidieua; tgi che maridava ina persuna d'otra religiun vegniva savens resguardà sco in desertur ch'abandunia il triepet en las stretgas. La tradiziun gidieua pretendeva che bab e mamma d'in uffant maridà ordaifer la cuminanza religiusa stettian en cordo-

li sco sch'el fiss mort. Ma il mund sa mida. Cun ils masdigls da la populaziun datti be pli paucas vistas da lètg aifer la cuminanza gidieua. Co duai questa sa deputar cun consorts da religiun differenta e cun lur uffants? Qua applitgescha il giudaisssem liberal ina pastoraziun flexibla che resguarda ils giavischs da las famiglias. Rabin Tovia: «Nus lain dialogar, d'ina vart cun ils gidieus ortodoxs, da l'otra cun ils libers pensaders. Mintgin d'els duai viver tenor sia atgna cardientscha» (p. 7). El formulescha plinavant la regla «d'esser sensibel als basegns dals umans en general, sco ch'i stat en la Bibla: 'Sco l'indigen tranter vus saja era l'ester che viva cun vus; ti duais l'amar sco ti tez, perquai che vus eras esters en l'Egipta' (Leviticus 19, 34)» (p. 8).

### Bunas relaziuns tranter confessiuns

Tar il cult divin festiv ha Nicole Poëll, parsura da la CGL, punctuà che «la suprastanza dettia grond pais a bunas relaziuns cun la Baselia refurmada e cun la catolica, sco era tut tshellas cuminanze da minorità (...). Peter Dettwiler, incumbensà da la Baselia refurmada, ha transmess las gratulaziuns da lezza e palesà sia stima per la Bibla ebraica. Sco simbol dal bun dialog tranter confessiuns ha'l surdà 'Alles wirkliche Leben ist Begegnung', essai da Martin Buber [filosof gidieu austriac (1878-1965), G. S.-C.] sco regal al rabin. Siegfried Artmann, represchentant da la Cuminanza centrala catolica, ha purtà ils giavischs da Peter Henrici, uestg auxiliar per Turitg e Glaruna, e Paul Vollmar, successur da Henrici davent da fanadur» (p.11). Da las bunas relaziuns ha dà perditga er in cult divin da be-

nedicziun, celebrà d'uestg Amédée Grab en la baselia catolica da Stäfa sper il Lai da Turitg. Benedi ha'l quattordesch fanestras cun maletgs biblics da mintgin var 4 m, realisadas da l'artist gidieu Dan Rubinstein. «Il cult divin cun accumpagnament musical cumpigliava quasi be psalms, (...) per che cristians e gidieus possian sa sentir 'da chasa'. L'istorgia da las fanestras è fitg remartgabla. In artist gidieu ha embelli ina baselia catolica cun fanestras da vaider; la part principala da la finanziaziun è vegnida da vart refurmada (...). Rubinstein era be fieu e flomma per il project e ha sa declerà pront da discutir a fund ils temas e la realisaziun cun il cumin-baselia; perquai è'l vegnì tschernì empè d'auters candidats. Senz'auter han ins acceptà sia suletta cundiziun, numnadain ch'el dovria be temas da la Bibla ebraica. Ins pudeva cumprar ina bellezza cudesch, cun text e maletgs da qualitad, che l'autur ha sutscrit persunalmain. Suentar la festa ha Rubinstein sez guidà ils giasts atras la baselia, (...) declerond la valur simbolica dals maletgs» (p. 29). Per tgi che vul savair dapli dal giudaisssem, organisescha la CGL in curs da Maya Grosser, davent dals 19 d'avust, mintga terz mardi saira da las 7 a las 9 (2). Tractadas vegnan la vita gidieua cun ses simbols e ritus, lura las festas ed isanzas a chasa ed utrò e dumondas religiosas generalas. Per frequentar lez curs na basegn'ins nagina enconuschientscha preliminar, mabain be mirvegla e buna veglia.

1) **«Luchot» 254, fanadur/avust 2003.**  
Fax 043 322 03 16. Posta electronica [luchot@ilg.ch](mailto:luchot@ilg.ch)

2) **Annunzias: Or Chadasch, tel. 043 322 03 14 (da las 8 a las 12). Posta electronica [info@ilg.ch](mailto:info@ilg.ch)**



Cun ils masdigls da la populaziun daventan cuminanze stget gidieuas pli e pli raras.

KEYSTONE